

# ጳውሎስ ዲሞቴዮስ ፃፊዳ ኮይር ኪታ ጋሳ ቆፋ

ዲሞቴዮስ ጌቲቲያ፡ አማኒያ ናዓቲላይ፡ ጉላ ኢሲያን ዩሌቲስ (ሃ.ኦ 16:1-3)። ኢያ ኣያ ኣይሁዳ፤ ኢያ ኣዋይ ቃሲ ገሪኬ ኣሲ። ኢ ጳውሎሳራ ኢሲፌ ኦሌይሳኔ ዋንጌላ ኦሶን ጳውሎሳ ማታን ማዲያ ኣሲ። ጳውሎስ ዲሞቴዮስ ፃፊዳ ኮይር ኪታይ ሄቩ ኣይፌ ቆፋታ ማንሱ ዪሌስ።

ኡባፌ ኮይርቲዲ ኪታይ፡ ዋሳ ኬላን ዳንዲዳ ዋርዶ ቲሚርቲያባ ማንሱዲ ኦዴስ። ሃ ኢማላ ቲሚርቲይ ኣይሁዳ ቲሚርቲያፌ ባጋ፡ ቃሲ ኣይሁዳ ገዶና ኣሳ ቲሚርቲያፌ ባጋ ኦይኪስ። ሄሲካ፡ «ሃ ቤንቲያ ኣላሜይ ናጋሪን ኢቲዳ ጊሾ ኣሲ ኣቶቲላ ዳማናው ዲማ ገዲዳ ፀራ ኤራናው፡ ኢሲ ኢሲ ካላታ ዋና ኣጋናዉን ማቾ ኤኮና ዋይኮ ኣዚና ጌሎና ኣጋናው ኮሼስ» ያገያ ቆፋ ባሶ ኦሌዲ ዳንዲስ።

ናምዓንሉ ቆፋይ፡ ዋሳ ኬላ ኣይሶባኔ ጎይኖ ዋጋባ ታማርሲያ ቲሚርቲያ፡ ሄሳዳካ ዋሳ ኬላ ካሌሌይሳቲኔ ኤንታ ማዴይሳቲ ኣይ ማላ ማራ ዱሱ ዳናው ቤሲያኮ ኦዴስ።

ዉርሴላን፡ ዲሞቴዮስ ዩሱስ ኪሪስቶስ ኦሌያ ሎዖ ኣሲ ዋኒዲ ገዳናው ቤሲያኮ፡ ቃሲ ዲማ ዲማ ኣማኒያ ኣሳ ማታን ኢያው ዳዒያ ኣዋቲላይ ኣይቤኮ፡ ጳውሎስ ኢያ ዘሪዳ ዘሪያ ዳሞስ።

## 1 ዲሞቴዮስ ኪታ ኣይፌ ቆፋታ

ጌሎ ቆፋ 1:1-2

ዋሳ ኬሌ ኣይሲያ ኣሳስ ኢሜቲዳ ኣይሶ ዋጋ 1:3-3:16

ዲሞቴዮስ ኢሜቲዳ ቲሚርቲያ 4:1-6:21

1 ኩና ኣሺያ ያሳኒኔ ኩ ኡፋይሳን ናገያ ዩሱስ ኪሪስቶስን ኪቲቲዳ፡ ዩሱስ ኪሪስቶስ ሃዋሪ ገዲዳ፡ ጳውሎሳፕ፡

2 ኣማናን ታው ቱማ ናዓ ገዲዳ ዲሞቴዮስ።

ያሳ ኩ ኣዋ፡ ኩ ጎዳ ኪሪስቶስ ኣጼ ኬሃቲላይ፡ ማርቲላይኔ ሳርቲላይ ኔው ገዶ።

ዋርዶ ቲሚርቲያፌ ናጌቲሌ

3 ታኒ ማቄዶኒያ ባሼ ኔና ሃዳሪዳይሳዳ፣ ኢሲ ኢሲ አሳቲ ዋርዶ ቲሚርቲያ ታማርሴይሳ ዲጋናው ኔ ኤፌሶንን ጋምዓና ሜላ ኮያይሰ።

4 ኤንቲ ጎሲ ባይና ሃይሴ ኦዳኔ ባንታ ኮቻ ታይቡዋ አጋናዳ ኦዳ። ሄሳ ሜላባይ ፓላማ ካሌጬሲፔ አቲን አማኖን ኦሴቲያ ያሳ ኦሱዋሰ ማዳና።

5 ሃ ኪታ ሁዔ ቆፋይ ጌሻ ዋዛናፔ፣ ሎዖ ካሃፔኔ ቱማ አማኑዋፔ ቤንቲያ ሲቁዋ ዴንጮሳናሳ።

6 ኢሲ ኢሲ አሳቲ ሃይሳ አጊዲ፣ ፓላና ኦዳኮ ሲሚዶሶና።

7 ኤንቲ ያሳ ሂጊያ አሰታማሬ ጊዳናው ኮዮሶና። ሺን ኤንቲ አይ ኦዲያኮ ዋይኮ ቱማ ኦሌዲ ኦዴይሲ ኢ አይቤኮ ኤርኮና።

8 አሲ ቤሴይሳዳ ሂጊያን ጎዔቲኮ ሂጊይ ሎዖ ጊዳይሳ ኤርሰ።

9 ኢሲባ አኬካናው ኮሼሰ። ሂጊይ ሎዖ አሳሰ ሜዴቲቤና። ሺን ሂጊይ፣ ሂጊ ሜንጮይሳታ፣ ዋራንዞታ፣ ያሴ ያዮናይሳታ፣ ሽምፖ ዋዴይሳታ፣ ናጋራንቸታ፣ ጌሻቴሌ ባይናይሳታ፣ ቱናታ፣ ሃሪ አቶሺን ባንታ አዪው ዋይኮ አዋ ዋዴይሳታ።

10 ላሚይሳታ፣ አዴይ አዴራ ላይማቴይሳታ፣ አሴ ባይዜይሳታ፣ ዋርዳንቸታ፣ ዋርዶን ጫቄይሳታ፣ ዋይኮ ቱማ ቲሚርቲያራ ጋሄቶና አይ ኦሶ ኦሌይሳታ ሴራናው ኬዪሰ።

11 ሄ ቲሚርቲይ ቦንቸኔ አንጄቲዳ ያሳይ ታኒ አዋጃና ሜላ ታው ሃዳራ አሚዳ ዋንጌላ ጊዶን ዴዔሰ።

**ያሳ ማርቲላስ ጳውሎሲ ጋላቲዳ ጋላታ**

12 ታኒ ኦሌያ ኦሱዋን ታው ዋልቃ አሚዳ ኑ ጎዳ ኪሪሰቶስ ዬሱሳ ጋላታይሰ። ታና ባ ኦሱዋሰ ሹሚዲ ሄ ኦሱዋሰ ቤሳሳ ጊዲ ታይቤዳ ጊሾ ኢያ ጋላታይሰ።

13 ታኒ ሃይሳፌ ካሴ ኢያ ጫዬይሳ፣ ኢያ ዬዴጫይሳኔ ሜቶሌይሳ ጊዲኮካ ታኒ ሄሳ ኤርናኔ አማኖና ኦሌዳ ጊሾ ያሳይ ታና ማሪሰ።

14 ኑ ጎዳይ ባ አዶ ኬሃቴላ ታ ቦላ ጉሲዲ፣ ሄ አዶ ኬሃቴላራ አማኖኔ ሲቆ ኪሪሰቶስ ዬሱሳ ባጋራ ታው አሚሰ።

15 «ኪሪሰቶስ ዬሱሲ ናጋራንቸታ አሻናው ሃ አላሚያ ዪሰ» ጊያ ቃላይ አማንጫይሳኔ አሳ ኡባይ ኤካናው ቤሴይሳ። ኡባፌ አዲዳ ናጋራንቸይ ታና።

16 ሺን ሜሪና ዴቦታ ኤካናው ኢያ አሚኒያ አሳሰ ታኒ ሌሚሶ ጊዳና ሜላ ዩሱስ ከሪሰቶሲ ዳሮ ዳንዳዲስ። ታው ኡባፌ አዲዳ ናጋራንቸቀሰ ያሳይ ባ ማርታ ዳርሲስ።

17 እይፌን ቤንቶናይሳስ፣ ኢሲ ያሳስ፣ ሃይቆናይሳስ፣ ሜሪና ካወቀስ፣ ሜሪናፕ ሜሪና ጋካናው ጋላታይኔ ቦንቸይ ጊዳ። አሚንዲ።

18 ዲሞቴዮስ፣ ታ ናዓው፣ ካሴ ኔባ ናቤቲ ኦዲዳ ቃላ ቦላ ኤቃዳ ሃ ኪታ ሃዳራ ኔው ኢማይስ። ኔ ሄ ቃላ ካሊኮ ሎዎ ኦላ ኦሌታና።

19 አማኖይኔ ሎዎ ካሂ ኔው ዴዎ። ኢሶቲ ኢሶቲ ካሃ ዳዩዲ ማርካቤይ ሆቤን ዳዩይሳዳ ባንታ አማኑቀ ዳይሲደሶና።

20 ሃሳ ሃኒዳይሳታ ጊዳን ሄሜንዮሲኔ ኢስኪንዲሬይ ዴዎሶና። ኤንቲ ታማሪዲ ያሳ ጫዩይሳ አጋና ሜላ ታኒ ዓላሄስ ኤንታና አላ ኢማስ።

## 2

### ዋሳባኔ ጎይኖባ

1 ኡባፌ ሲንጻታዳ፣ አሳ ኡባስ ያሳ ኦይቻናው፣ ዋሳናው፣ ጋናታናውኔ ጋላታናው ቤሴይሳ ታኒ ኔና አኬኪሳይስ።

2 ኦኒ ቱማ አና ዴዎኒኔ ጌሻቴላን ያሳ ጎይኒሼ ሳርቴላኒኔ ዎፑ ጊዳ ዴዎን ዳና ሜላ ካዎታሲኔ ሹማታ ኡባስ ዋሲቱ።

3 ሃሳ ሜላ ዋሳይ ኦና አሺያ ያሳ ሲንጻን ሎዎኔ ኡፋይሲያባ።

4 ያሳይ አሲ ኡባይ አታናዳኔ ቱማ ኤራናዳ ኮዩስ።

5 ኢሲ ያሲ ዴዎስ። ያሳፌኔ አሳፕ ጊዳን ጊዲዲ ሲጌሊያ ኢሶይ ዴዎስ፤ እካ አሴ ጊዲዳ ከሪሰቶሰ ዩሱሳ።

6 ኢ አሳ ኡባ ዋዛናው ባና አላ ኢሚስ። ያሳይ ባ ዎዲያን አሳ ኡባ ዋዛናው ኮዩይሳ ቤሲያ ማርካይ ሃይሳ።

7 ያሳይ ታና ዎንጌላስ አስታማሬኔ ሃዋሬ ኦላዲ ደሪዳይ ሃሳሳ። ታኒ ቱማ ኦዳይስ፤ ዎርዶቲኬ፤ አማኖኔ ቱማ አይሁዴ ጊዳና አሳስ ማርካታና ሜላ ያሳይ ታና ሹሚስ።

8 ሃሳ ጊሹ፣ ኡባ ቤሳን ዴዲያ አዳቲ፣ ባንታና ያሳስ ዲማዩዲ፣ ሃንቆኔ ፓላማ ዲጊዲ፣ ባንታ ኩሺያ ፑዴ ዴንሊዲ ያሳ ዋሳና ሜላ ኮያይስ።

9 ሃሳዳ ማጫሳይ ባንታና ሃሪዳይሳ ቆንጨሲያ፣ ቦንቸይኔ ማሪ ዴዲያ ማዕቀ ማሳናው ቤሴስ። ኤንቲ ማሪ ባይና ሁዔ ዳላን፣ ዎርቃን ዎይኮ ኢንቆን፣ ዎይኮ አልዎ አፊላን ባንታና አሌቂሶ።

- 10 ሺን ያሳስ ጎይናይስ ገያ ማጫሳይ ባንታው ቤሴይሳዳ ሎዎባ ኦሶና።
- 11 ማጫሳይ ኪቴቴላን ሲዒ ገዲ ታማር።
- 12 ታኒ ማጫሳይ ታማርሳና ሜላ ዋይኮ እዴ ቦላ አዋታና ሜላ ገደናሺን ሲዒ ገዲ ዳና ሜላ ኮያይስ።
- 13 አዳሚይ ኮይሮ ሜዴቲስ፤ ጉዬፕ ሄዋና ሜዴታሱ።
- 14 ቃሲ ጨሜታዳ ያሳ ሂገያ ሜንሲዳይ ማጫሳይ ኦቴን አዳሜ ገዴና።
- 15 ሺን ማጫሳይ አማኖን፣ ሲቆኒኔ ጌሻቴላን ባንታና ሃሪዲ ዴዒኮ \* ናይታ ዩሎን አታና።

### 3

#### ዋሳ ኬላ ጨማታ

- 1 ኦኒካ፣ «ዋሳ ኬላ ካሌሊያ አሲ ገደናው ኮይኮ ሎዎባ አሞቴስ» ገያ ኦዳይ ቱማ።
- 2 ዋሳ ኬላ ካሌሊያ አሲ ቦሬቶናይሳ፣ አሲ ማቺ ዓላሊ ዴዔይሳ፣ ማራን ዴዔይሳ፣ ባና ሃሪይሳ፣ ቤሴይሳዳ ኦሌይሳ፣ አማሌ ሞኬይሳ፣ ታማርሳናው ዳንዳዔይሳ፣
- 3 ማሶቶናይሳ፣ ኦዩቶናይሳ፣ ፓላሞናይሳ፣ ሚሼ ሲቆናይሳ፣
- 4 አያ ናይቲ አያው ኪቴቴይሳኔ ቦንቺይሳ፣ ባ ኬላ አይሳናው ዳንዳዔይሳ ገደናው ቤሴስ።
- 5 አሲ አሲ ባ ኬላ አይሳናው ዳንዳዎና ኢዲኮ፣ ያሳ ዋሳ ኬላ ዋቲ አይሳናው ዳንዳዒ?
- 6 ኦቶሮን ሱጌቲዲ፣ ዓላሃይ ያሳ ፒርዳን ኩንዲዳይሳዳ ኩንደና ሜላ፣ ኦራላ አማኒዳ አሲ ገደናው ቤሴና።
- 7 ቦሬኒኔ ዓላሃ ዲሃን ጌሎና ሜላ ሄ ኡራይ አማኖና አሳ ማታን ናሹቴይሳ ገደናው ቤሴስ።

#### ዋሳ ኬላ ዳቆኔታ

- 8 ሃሳዳ ቃሲ ዋሳ ኬላ ዳቆኔቲ ቦንቺቲዳይሳታ፣ ናሞዑ ደና ኦዳቶናይሳታ፣ ዳሮ ዋይኔ ኡሻ ኡዮናይሳታ፣ ሚሼ ያሬቶናይሳታ፣
- 9 አማኑዋ ፀራ ጌሻ ካሃን ናጌይሳታ ገደናው ቤሴስ።
- 10 ኤንቲ ኮይሮቲዲ ፓጨታናው ኮሼስ፤ ኤንታ ቦላ ቦሬይ ባይና ኢዲኮ፣ ዋሳ ኬላ ዳቆኔ ገዲዲ ኦሶ።

---

2:13 ሜዴ 2:7፣ 21-22    2:14 ሜዴ 3:1-6    \* 2:15 ባንታና ሃሪዲ ዴዒኮ፣ ዋይኮ አያ ዩሊዳ ናይቲ አማኖን፣ ሲቆኒኔ ጌሻቴላን ባንታና ሃሪዲ ዴዒኮ።    3:2 ቲቶ 1:6-9

11 ሄሳዳካ፥ ኤንታ ማጫሳቲ ቦንቹቲዳይሳታ፥ ዘጊርናይሳታ፥ ማራን ዴዔይሳታ፥ ኡባባን አማኔቴይሳታ ጊዳናው ቤሴስ።

12 ዋሳ ኩላ ዳቆኔቲ ኢሲ ማቺ ፃላሊ ዴዔይሳ ጊደ። ባ ናይታኔ ባ ኩላ ሎይሲ አይሴይሳ ጊዳናው ቤሴስ።

13 ዋሳ ኩላ ዳቆኔ ጊዲዲ፥ ሎፆ ኦሶ ኦሴይሳቲ፥ ኤንታው ጊታ ቦንቾ ቃሲ ኪሪሰቶስ ዩሱሳን ባንታው ዴዔያ አማኑዋባ ኦዳናው ዳሮ ሚናቴሲ ዴማና።

**ጊታ ፀራ**

14 ታኒ ሃ ኪታ ኔው ፃፋሼ፥ ኤሌሳዳ ኔኮ ባና ጋዳ ኡፋይሴ ቦላይስ።

15 ሺን ታኒ ቦና ጋምዒኮ፥ ያሳ ኩላን አሳይ ዋኒዲ ዳናው ቤሲያኮ ኤራና ሚላ ሃይሳ ኔው ፃፋይስ። ዴፆ ያሳ ኩላይ ቱማቴላስ ቱሲኔ ባሶ።

16 ኑ አማኑዋ ፀራይ ሲዲይ ባይና ጊታ።

ኪሪሰቶሲ አሾ ማዒዲ ቆንጨሰ፤

ኢያ ቱማቴላ ጌሻ አያናይ ማርካቲስ።

ኪታንቾታስ ቤንቲስ፤

ኢ ካዎቴላ ኡባስ ሳባኬቲስ።

አላሜን ዴዔያ አሳን አማኔቲስ፤

ቦንቾን ሳሎ ኤኬቲስ።

**4**

**ዋርዶ አስታማሬታ**

1 ያና ዋዲያን ባሌሊያ አያናታኔ ቱና አያናታ ቲሚርቲያ ካሊዲ፥ ኢሲ ኢሲ አሳይ አማኑዋ ካዳናይሳ ጌሻ አያናይ ቆንጨሲዲ ኡዲስ።

2 ሄሳ ሚላ ቲሚርቲይ ኤንታ ካሃይ ዶጨን፥ አሳ ባሌሊያ ዋርዶንቾ አስታማሬታፔ ዩስ።

3 ሄሳ ሚላ አሳቲ ኤኮኔ ጌሎ ቃሲ ኢሲ ኢሲ ካላታ ሞና ሚላ ደጎሶና። ሺን አማኔይሳቲኔ ቱማ ኤሬይሳቲ ያሳ ጋላቲ ዋሲዲ ማና ሚላ ያሳይ ካሊ ሜዲስ።

4 ያሳይ ሜዲዳ ኡባባይ ሎፆ። ያሳ ጋላቲዲ ሚኮ ዋራ ዋዲያባይ አይቢካ ባዎ።

5 ኡባባይ ያሳ ቃላኒኔ ዋሳን ጌሺ ጊዴስ።

ኪሪሰቶሳስ አማኔቲዳ አይሌ ጊደ

6 ሄሳ ጊሾ፡ ኔኒ ሃ ተሚርቲያ አማኔይሳታ ታማርሲኮ፡ ኑ አማኑዋኒኔ ሎዎ ተሚርቲያ ከቲታዳ ዲጪዳ ኪሪስቶስ ዬሱሳ ሎዎ አይሌ ጊዳና።

7 ሺን ጎራ ባይና ቱማ ጊዳና ኦዳፔኔ ጨማ ማጫሳ ሃይሲያፔ ባቃታ። ቱማ አያና ዴዎን ዳናው ኔና ሎሂሳ።

8 አሲ ባ አሳቴላ ሚንላናው ኦሊያ ኦሶይ ጉሊ ማዴስ። ሺን ቱማ አያና ዴዎን ባና ሎሂሶይ ሃራካ ሜሪናጫካ ዴዎ አሚያ ኡፋይሲ ዴሚያ ጊሾ ኡባስ ማዴስ።

9 ሃ ቃላይ አሳ ኡባይ ኤካናው ቤሲያ ቱማ ኦዳ።

10 ኑኒ አሳ ኡባ፡ ኡባፌ አሊዲ አማኔይሳታ አሺያ ዴዎ ያሳፌ ኤካና ጊዲ ኡፋይሳን ናጊያ ጊሾ፡ ሄሳስ ኑኒ ኦሶን ዳቡሮሲኔ ባጭቶስ።

11 ሃይሳ ከታኔ ታማርሳ።

12 ኔኒ ያላጋ ጊዲያ ጊሾ ኔና ኦኒካ ካጵፖ። ሺን አማኔይሳታስ ኔኒ ኦዳን፡ ኦሶን፡ ሲቆን፡ አማኖኒኔ ጌሻቴላን ለሚሶ ጊዳ።

13 ታኒ ያና ጋካናው አሳስ ጌሻ ማፃፋ ናባቦን፡ ሳባኮኒኔ ታማርሶን ሚና።

14 ቲንቢቴይ ኦዴቲን፡ ጨማቲ ባንታ ኩሺያ ኔ ቦላ ዋሊዳ ዋዴ ኔኒ ኤኩዳ፡ ኔናን ዴሚያ ጌሻ አያና አሞታ ካጵፓ።

15 ኔ ዲቻይ አሳ ኡባስ ቆንጫና ሜላ ሄሳ ሚንላ ቆፓ፤ ሃይሳ ኡባ ዋዴ ኦሳ።

16 ኔ ሁሚያሲኔ ኔ ተሚርቲያስ ናጌታ። ኔኒ ሄሳ ኡባ ዋዴ ኦሊኮ ኔናኔ ኔና ሲዔይሳታ አሻሳ።

# 5

## አምዔታባ

1 ጨማ አዴታ ኔ አዋዳ ቦንቻፌ አቲን ሃንቄቶፋ። ያላጋ አዴታ ኔ አሻዳ ኦላዳ ጃላ።

2 ጨማ ማጫሳታ ኔ አዪዳ፡ ያላጋ ማጫሳታ ኔ ሚቹዳ፡ ፖሎ ጌሻቴላን ኦይካ።

3 አዚኒ ሃይቂዳ ቱማ አምዔታ ቦንቻ።

4 ሺን አምዔስ ናይቲ ዋይኮ ናይታ ናይቲ ዴራኮ፡ ሄ ናይቲ ቱማ አያና ዴዎን ዴዔይሳ ቤሳናው ባንታና ዬሊዳይሳታኔ፡ ባንታ ዋጋ አዪጫኔ ዋጋ አዋ ማዲዲ ኩሼ ዛሮ ታማሮ። ሄሲ ያሳ ኡፋይሲያባ።

5 ባርካ ዳዒያ ቱማ አምራያ ያሳፌ ማዴ ዳማናው ኡፋይሳን ናገሱ። ጋላሴኔ ቃማ ያሳይ ባና ማዳና ማላ ዋሳወሱኔ ኦይቻወሱ።

6 ሺን ሃ አላሚያን ሎዖ ዱሳ ዓላላ ኮያ አምራያ ፓፃ ዳዓሼ ሃይቋዳሮ።

7 ኦኒካ ኤንታ ቦሮና ማላ ሃ ኪታ ኤንታው ኢማ።

8 ሺን ባ ዳቦታሰ፣ ኡባፌ አሊዲ ባ ሶ አሳሰ ቆፖና ኦኒካ ባ አማኑዋ ካዲዳይሳ፤ አማኖና አሳፔካ አቋዳ ኢታ።

9 ላይሌ ኡሱፑን ታሙ ኩሚቦና አምዔ ሱንፋ ማዘጋባን ፃፎ። ቃሲ ሄሳ ቦላ ኢያ ባ አዚናሰ አማኔቲዳሮ ገዳናው ኮሼሰ።

10 ናይታ ዲሾን፣ ኢማሌ ሞኮን፣ ጌሻታ ቶሁዋ ሜቻን፣ ሜቶቲያ አሳ ማዴን፣ ሎዖ ኦሶ ኡባሰ ባና አላ ኢሚዳሮኔ ሎዖ ኦሶን ኤራቲዳሮ ገዳናው ቤሴሰ።

11 ሺን ያላጋ አምዔታ ሱንፋ ማዘጋባን ፃፎ። ኤንታና አዚና ጌሎ ጌሎ ገያ አሾ አሞይ ኦይኪያ ዋዴ ኪሪሰቶሳ አገና።

12 ኤንቲ ኮይሮ ጌሊዳ ቃላ ሜንሊዳ ገሾ ፐርዳታና።

13 ሄሳ ቦላ ኤንቲ ኦሶ ቆይዲ ኬላፌ ኬሌ ዩያና። ዩሻ ዓላላ ገዳናሽን ዘገርሳላኒኔ ባንታና ጋላናባን ጌሊዲ ቤሶናባ ኦይቶሶና።

14 ሄሳ ገሾ፣ ኑ ሞርኬቲ ኑ ቦላ ኦይቲያ ኢታባ ዴሞና ማላ ያላጋ አምዔቲ አዚና ጌሊዲ፣ ናዓ ዩሊዲ፣ ባንታ ኬላ አይሳና ማላ ዘራይሰ።

15 ሃይሳፌ ካሴ ጉላ አምዔቲ ዓላሄ ካላናው ጉዬ ሲሚደሶና።

16 ኢሲ አማኒያ ማጫሴሰ ሶ አሳ ገደን አምዔቲ ዳዒኮ ኢያ ኤንታ ማዳናው ቤሴሰ። ሄሳዳ ኦሊኮ፣ ዋሳ ኬላሰ ቶሆይ ካወዩሰ። ሄ ዋዴ ዋሳ ኬላይ ማዴ ቤሲያ ቱማ አምዔታ ማዳናው ዳንዳዔሰ።

17 ዋሳ ኬሊ ሎይሊ ሄሚያ ጨማቲ፣ ኡባፌ አሊዲ፣ ቃላ ሳባኮኒኔ ታማርሶን ዳቡሬይሳቲ ዳኮ ቦንቾ ኤካናው ቤሴሰ።

18 ጌሻ ማፃፋይ፣ «ዉደማን ካላ ዩቋያ ቦራ ደና ቃቾፋ» ሄሳዳካ፣ «ኦሳንቾይ ባ ዳሞዚያ ኤካናው ቤሴሰ» ያጌሰ።

19 ናምዑ ዋይኮ ሄቹ ማርኪ ባይና፣ ዋሳ ኬላ ጨማ ሞቲያባ ሲዖ።

20 ሃራቲ ያያና ማላ ናገራ ኦሊያ ኦናካ አሳ ኡባ ሲንፋን ሃንቁታ።

21 ኔኒ አሳ ሶምዖ ቤዖና፣ ኢሱዋ ኢሱዋፌ ዳማኖና ሃ ኪታ ናገና ማላ ያሳ፣ ጎዳ ዩሱሰ ኪሪሰቶሳኔ ደሬቲዳ ኪታንቾታ ሲንፋን ታ ኔና ዘራይሰ።

22 ኦዴ ቦላካ ኔ ኩሺያ ዋላዳ ሹማናው ኤሌሶፓ። ሃራታ ናጋራን ጌሎፓ፤ ኔና ጌሻቴላን ናጋ።

23 ኔኒ ኡባ ዋዴ ሃርጌቲያ ጊሾኔ ኔ ኡሎ ሃርጌያ ጊሾ ሃላ ፃላላ ኡዮፓ፤ ጉላ ዋይኔ ኡያ።

24 ኢሲ ኢሲ አሳታ ናጋራይ ቆንጨ፣ ኤንታ ናጋራይ ኤንታ ፒርዳናው ኤንታፊ ሲንሐ ኣጼሰ፣ ሺን ሃራታ ናጋራይ ጉዬፔ ጋሞዒዲ ቆንጨሰ።

25 ሄሳዳ፣ ሎዖ ኦሶይካ ቆንጨ፣ ቆንጮና ኢዲኮካ ጌማናው ዳንዳዔና።

### 6

#### አይሌታሰ አሜቲዳ ዘሬ

1 ፆሳ ሱንላይኔ ኑ ቲሚርቲይ ጫዬቶና ሜላ አይሌቲላን ዴዔይሳቲ ባንታና ሃሪያ ጎዳታ ቦንኛ።

2 አማኒያ ጎዳቲ ዴዒያ አይሌቲ፣ ኤንታ ጎዳቲ ኤንታው አሽ ጊዲያ ጊሾ ኤንታ ካጵፖ። ኤንታ ኦሱዋን ማዴቲያ ጎዳቲ፣ አማኔይሳታኔ ዶሴቲዳይሳታ ጊዲያ ጊሾ ኤንቲ ካሴይሳፊ አሌዲ ኦላናው ቤሴሰ።

#### ዋርዶ ቲሚርቲያኔ ቱማ ዱሬቴላ

ኔኒ ሃይሳ ታማርሳናውኔ ኤንቲ ኦላና ሜላ ዘራናው ቤሴሰ።

3 ኦኒካ ዲማ ቲሚርቲያ ታማርሲያባ ጊዲኮ፣ ኑ ጎዳ ዬሱሰ ኪሪሰቶሳ ቱማ ቃላራኔ ኑ አማኑዋ ቲሚርቲያራ ጋሄቴና።

4 ሄ ኡራይ ኦቶርን ሱጌቴሲፔ ኣቲን ኣይኮካ ኤሬና። ኤንታው ኢሲ ቆፋ ቦላ ፓላማናውኔ ኦዬታናው ኢታ አሞይ ዴዔሰ። ሄሲ ቃናቲ፣ ኦሺ፣ ጫሼ፣ ኢታ ሲጼኔ፣

5 ጊንና ፓላማ ካሌሴሰ። ቃሲ ኤንታው ኢታ ዋዛኒ ዴዔሰ፤ ቱማካ ባሊዶሶና፤ ኤንቲ ፆሳ አማናይ ዱሬቴላሰ ኦጌ ጊዲ ቆፖሶና።

6 ሺን ታው ዴዒያባይ ጊዳና ጊያ ኣሳሰ ቱማ ኣያና ዴዖይ ጌታ ዋጼ።

7 ኦኒ ሃ ኣላሚያ ኣይኮካ ኤሂቦኮ፤ ቃሲ ኢያፔ ኣይኮካ ኤኪዲ ቦኮ።

8 ኦሰ ካሊኔ ማዖይ ዴዒኮ ሄሲ ጊዳና።

9 ሺን ዱሬቴላ ኮዬይሳቲ ፓጨኒኔ ጊሄን ጌሎሶና። ቃሲ ኤንታና ዱጌ ዳፊያኔ ጳይሲያ ኤያቴሊኔ ቆሂያ አሞን ኩንዶሶና።

10 ሚሼ ሲቆይ ኢታቴላ ኡባሰ ፑልቶ። ኢሶቲ ኢሶቲ ሚሼ አሞቲሼ አማናፔ ባሌቲዲ ዳሮ ሜቶን ባንታና ዬጊዶሶና።



**ዲሞቴዮስ ኢሜቲዳ ዞሬኔ ኪታ**

11 ሺን ኔና፣ ያሳ አሶ፣ ሃሳፌ ባቃታ። ዲሎቴላ፣ ያሳ ዳና፣ አማና፣ ሲቆ፣ ዳንዳዒኔ አሽኬቴላ ካላ።

12 አማና ባዲያ ሎይላ ባዴታ። ዳሮ አሳ ሲንላን ኔ ማርካቲዳ ኔ አማኑዋባ፣ ያሳይ ኔና ኢያው ያጊዳ ሜሪና ደዑዋ ኦይካ።

13 ኡባሰ ደዎ ኢሚያ ያሳ ሲንላኒኔ፣ ጳንዌ ጲላያሳ ሲንላን ሎዎ ማርካ ማርካቲዳ ኪሪሰቶስ ዩሱሳ ሲንላን ታ ኔና ኪታይሰ።

14 ኑ ጎዳ ዩሱሰ ኪሪሰቶሲ ቆንጫና ጋካናው ሃ ኪታ ባሊኔ ቦሬይ ባይና ናጋ።

15 ባ ያላላ ኡባ ሃሪያ ቦንቾ ያሳይ፣ ካዎታ ካዎይ፣ ጎዳታ ጎዳይ፣ ባ ቆፒዳ ቃማን ዩሱሰ ኪሪሰቶሳ ዛሪ ኪታና።

16 ኢሲ ኢያ ያላሊ ሃይቁና። ኦኒካ ሺቃናው ዳንዳዖና ፖዖን ዴዔሰ። ኦኒካ ኢያ ቤዒቤና፣ ቃሲ ቤዓናዉካ ዳንዳዒና። ቦንቾይኔ ሜሪና ዋልቃይ ኢያው ጊድ። አሚንዒ።

17 ሃ አላሚያ ዱሬቲ ጮ ጳያ ሻሎን ኦቶርቶና ሜላኔ ጨቆና ሜላ ኦዳ። ኑሰ ኮሺያባ ፓላሂሲዲ አሚያ ኑና አንጂያ፣ ዱሬ ያሳን አማኔታና ሜላ ኤንታ ኪታ።

18 ኤንቲ ሎዎ ኦሶ ኦሳናዳ ሎዎ ኦሶን ዱሬታናዳ፣ ኬሃታኔ ሃራታሰ ሻኬይሳታ ጊዳና ሜላ ኪታ።

19 ሄሲ ኤንታው ሲንላሰ ሚኖ ባሶ ጊዲያ ጊሾ ሄ ዋዴ ኤንቲ ቱማ ዴዖይ አይ ዳኒያኮ ኤራና።

20 ዲሞቴዮስ፣ ኢሲ ኢሲ አሳይ፣ «ኤራቴላ» ጊያ ኤያ ፓላማፔኔ ሃዳ ኦዳፔ ባቃታ፤ ኔው ኢሜቲዳ ሃዳራ ናጋ።

21 ኢሶቲ ኢሶቲ ኑሰ ኤራቴላ ዴዔሰ ያጊሼ አማኑዋ አጊደሶና። ያሳ አጽ ኬሃቴላይ ሂንቲ ኡባራ ጊድ።

**ኦራሳ ጩቂዋ ጎፋላ**  
**New Testament in Gofa**

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Gofa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 18 Apr 2025 from source  
files dated 29 Jan 2022

c35d6c73-3843-5482-b53e-7559d35deee5